

Minister ing. Mike de Meza:

# **Inversion di Citgo Petroleum Corporation na Aruba ta entre 700 miyon y 1 biyon dolar**

**Ta inclui conexion di gas for di  
Venezuela pa San Nicolas**

**COMO** 700 miyon dolar t'e inversion minimo cu Citgo Petroleum Corporation ta bay realisa riba e facilidadnan na San Nicolas pa converti esaki den un 'upgrader' di crudo. Asina Minister di Energia, ing. Mike de Meza a splica miembronan di prensa. E cifra exacto ta dificil pa bisa mirando cu ta despues cu e trabounan cuminsa y avansa, lo tin un idea mas detaya.

Un parti di e inversion aki ta un sistema di suministro di gas cu ta core for di tereno enorme na Venezuela y lo yega Aruba bou di lama. E proyecto aki ta forma parti di e exigencia di parti di Gobierno di Aruba p'e planta ta uno mas 'green' den su forma di opera. Minister de Meza ta admiti cu "e inversion ta uno basta cuantioso." Riba papel e ta casi un biyon dolar, pero ta na momento cu bay aden y haci un inspeccion hopi mas detaya y cuminsa traha riba paketenan cu ta bay ehecuta, e ora ta haya e cifra final cu ta mas specifico.

"E lo ta minimo 700 miyon dolar," asina e titular di energia a indica. Tambe a splica cu e gas ta bin for di e tereno grandi cu yama 'Perla 4 Cardon' y ta ubica den e awanan teritorial di Venezuela. For di eynan ta core un liña di gas bou awa dirigi p'e area di Cardon den Peninsula di Paraguana. Di eynan e ta drenta lama bek direccion Aruba y ta subi banda di e refineria. Manera anuncia anteriormente, un di exigencianan estableci dor di Gobierno di Aruba na CITGO, ta p'e planta opera di e manera mas ecologico cu por.

E uzo di gas ta acopla na un proyecto di 'Carbon Capture' caminda ta coy e emision di carbon cu normalmente ta bay den atmosfera. Den e caso aki ta usa e material emiti pa cultivo di alga (algen) cu, na su turno ta wordo uza como un recurso sostenibel den fabricacion di otro productonan; p.e., cosmetica y habon.

Minister Ing. Mike de Meza:

# **Tin bon comprondemento cu Valero pa caba di atende asuntonan pendiente**

**E MANERA** profesional con Gabinete Mike Eman II y su delegacion a atende henter e proyecto di reapertura di refineria na San Nicolas ta keda demostra no solamente den e acuerdo cu a anuncia diabierna ultimo y ta bay firma proximamente, pero tambe den e manera con ta atende cu e operador anterior, esta Valero.

Minister di Energia, Ing. Mike de Meza a confirma na prensa cu comunicacion cu e operador anterior di e refineria na San Nicolas a bay den bon ambiente. Pronto Palamento di Aruba lo haya debidamente tur pakete cu detayenan di e manera con ta clausura tur asunto pendiente. Ta trata aki di impuestonan, limpieza y traspaso di facilidad, entre otro.

Minister Ing. de Meza a splica na miembronan di prensa durante e conferencia di siman pasa cu ta existi un bon comprondemento entre Valero y Gobierno di Aruba.

Siman pasa, Prome Minister Mike Eman y su persona a sinta cu CEO di Valero, Joseph Gorder, ademas di otro Vice-President ehecutivo pa discuti e pakete total. Esaki ta e mesun pakete cu ya caba e delegacion di Aruba ta negociando.

E mandatario no kier a revela detayenan ainda, ya cu segun nos sistema legislativo, Parlamento ta e prome yama pa haya e pakete oficial pa bay over na duna su aprobacion. Loke si Minister de Meza a reafirma ta cu esaki ta un stap cu lo tuma luga pronto, den cuestion di algun siman.

Adicionalmente e titular di Energia a duna di conoce cu ta hopi loke Valero ta laga atras, cuminsando na e facilidadnan.

Tin otro aspectonan importante cu e compania Mericano lo mester cumpli cu nan manera su obligacionnan cu e 'Environmental Fund', como tambe otro ahustenan di caracter fiscal, di limpieza: tur conoci caba.